



Komunikado di prensa 2018-040

Status florin karibense

Willemstad/Philipsburg – *Centrale Bank van Curaçao en Sint Maarten* (CBCS) a inklui komo meta den su plan stratégiko, ku e lo inisiá ku preparashonnan pa introdukshon di un moneda nobo, den e kaso aki e florin karibense, pa e paisnan Kòrsou i Sint Maarten. E paisnan a kombení ku pa e restrukturashon estatal di 10 di òktober 2010, unda Kòrsou i Sint Maarten a bira paisnan outónomo den Reino, ku nan lo forma un union monetario i ku nan lo introdusí un moneda komun nobo. Esaki tambe ta ankrá den e Statuto di Banko Sentral di Kòrsou i Sint Maarten i den e Areglo Komun di e sistema di Plaka Kòrsou i Sint Maarten (*Regeling Gemeenschappelijk Geldstelsel Curaçao en Sint Maarten*).

Debí ku e union monetario ta forma e base pa e moneda komun, CBCS lo asistí e gobièrnunan ku evaluashon di e union monetario promé. Na momentu ku tin konsenso tokante kontinuashon dje union monetario entre e paisnan Kòrsou i Sint Maarten, CBCS lo entamá e siguiente pasonan pa introdukshon di e moneda nobo.

E fecha tentativo menshoná di yanüari 2021 pa introdukshon di e florin karibense ta dependé di e eventual desishon di e paisnan pa introdusí un moneda nobo i e espasio di tempu kalkulá pa e proseso di produkshon di e moneda.

E florin karibense (CMg) ta, meskos ku e florin antiano-ulandes (NAf), legalmente mará na e dòler Merikano kontra e paridat di $US1 = CMg 1.79$. Si finalmente disidí pa kontinuá ku e union monetario i introdukshon di e florin karibense, lo kambia florinnan antiano-ulandes pa florinnan karibense kontra un ratsio di un pa un. E ratsio di un pa un ta legalmente ankrá den e Areglo Komun di e sistema di Plaka Kòrsou i Sint Maarten (*Regeling Gemeenschappelijk Geldstelsel Curaçao en Sint Maarten*).

Willemstad 21 di sèptèmber 2018
CENTRALE BANK VAN CURAÇAO EN SINT MAARTEN